

Rwanda: Baravuga ko hari ikizere cy'igabanuka ry'Ibiciro ku Isoko

March 16, 2023

Bamwe mu baguzi n'abacuruzi bo hirya no hino ku masoko y'imbere mu gihugu, baravuga ko hari icyizere bagenda babona cy'igabanuka ry'ibiciro ku isoko, ibyo babishingira mu kuba Leta y'u Rwanda ko hari ingamba yagiye ifata mu guhangana n'iki kibazo.

Bavuga ko ahanini binagendeye no kuri imwe mu myanzuro yafatiwe mu nama y'igihugu y'umushyikirano.

Ku masoko yo hirya no hino mu Mujyi wa Kigali, bamwe mu bacuruzi n'abaguzi bagaragaza ko ubu hari icyizere barimo kubona kijyanye n'igabanuka ry'ibiciro ku isoko bagereranyije no mu mezi ashize.

Uwizihiwe Floribert, umushakashatsi akaba n'umwarimu muri Kaminuza avuga ko icyizere ku igabanuka ry'ibiciro ku isoko ahanini kuri we abona gishingiye kuri zimwe mu ngamba Leta yagiye ishyiraho zunganira abahinzi.

Umwanzuro wa karindwi mu myanzuro 13 yafashwe mu nama y'igihugu y'umushyikirano, ugaruka cyane mu gukomeza gushyira mu bikorwa ingamba zo guhangana n'izamuka ry'ibiciro ku masoko,

Ibi ni nabyo Minisitiri w'Intebe, Dr Edouard Ngirente yagarutseho ubwo yarari muri iyi nama y'igihugu y'umushyikirano, aho yashimangiye ko hari icyizere cy'igabanuka ry'ibiciro muri uyu mwaka bitewe n'inyunganizi Leta yagiye ishyira mu nzego zitandukanye.

Imibare iheruka y'ikigo cy'Igihugucy'Ibarurishamibare mu

Rwanda yagaragaje ko ukwezi kwa Gashyantare 2023, ibiciro mu mijyi byiyongereyeho 20,8% ugereranyije na Gashyantare 2022, aho iby'ibiribwa n'ibinyobwa bidasembuye byiyongereyeho 42,4%.

Iyo urebye mu byaro, muri Gashyantare 2023 ibiciro byiyongereyeho 37,1% ugereranyije na Mutarama 2023, aho byari byiyongereyeho 38,8%.

Ni mu gihe kandi muri rusange, iyo ugereranyije Gashyantare 2023 na Mutarama 2023 usanga ibiciro byariyongereyeho 1,8%.